

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“ broj: 49/06 i 51/09), člana 119. Statuta Općine Cazina („Službene novine Općine Cazina“, broj: 13/10), člana 10. i člana 25. Statutarne Odluke („Službene novine Grada Cazina“, broj: 1/17) a u vezi sa članom 15. Odluke o organizaciji i djelokrugu rada Jedinstvenog Gradskog organa uprave Grada Cazina („Službene novine Grada Cazina“, broj: 1/17) i u vezi sa Budžetom grada Cazina, konkretno pozicija „Subvencija privatnim preduzećima i poduzetnicima“ i članom 8. Odluke o izvršavanju Budžeta grada Cazina za 2020.godinu, Gradonačelnik grada Cazina na prijedlog Službe za privredu donosi

P R A V I L N I K
O KRITERIJIMA, NAČINU I POSTUPKU RASPODJELE SREDSTAVA IZ
BUDŽETA GRADA CAZINA U SVRHU SUBVENCIONIRANJA I MJERA POTICAJA
PRIVATNIM PREDUZEĆIMA I PODUZETNICIMA U CILJU SANACIJE POSLJEDICA U
PRIVREDI UZROKOVANIH PANDEMIJOM KORONAVIRUSA (BOLESTI COVID-19) I
RAZVOJA PRIVREDE

POGLAVLJE I – OPĆE ODREDBE

Član 1.
(Predmet)

(1) Ovim Pravilnikom utvrđuju se kriteriji, način i postupak raspodjele sredstava iz Budžeta grada Cazina u svrhu subvencioniranja i mjera poticaja privatnim preduzećima i poduzetnicima u cilju sanacije posljedica u privredi uzrokovanih pandemijom koronavirusa (bolesti covid-19) i razvoja privrede, a odnosi se na subvencioniranje usluga odvoza smeća, komunalne naknade i vodnih usluga.

(2) Za ove namjene će se koristiti dio sredstva Budžeta grada Cazina za 2020. godinu sa budžetske pozicije „Subvencija privatnim preduzećima i poduzetnicima“.

Član 2.
(Korisnici subvencija)

(1) Pod korisnicima subvencija u smislu ovog Pravilnika se smatraju ona privatna preduzeća i poduzetnici kojima je naredbama Federalnog štaba civilne zaštite i Kantonalnog štaba civilne zaštite USK-a zabranjen ili obustavljen rad zbog proglašenja stanja nesreće uzrokovane pandemijom koronavirusa (bolesti covid-19) odnosno proglašenja stanja prirodne nepogode, a koja imaju sjedište na području grada Cazina.

(2) Pod privatnim preduzećima u smislu stava 1. ovog člana se smatraju i poslovne jedinice koje imaju sjedište na području grada Cazina, ali pod uslovom da je osnovno preduzeće također sa sjedištem na području grada Cazina.

Član 3.
(Subvencije)

(1) U skladu sa Budžetom grada Cazina za 2020.godinu, konkretno pozicijom „Subvencija privatnim preduzećima i poduzetnicima“ i članom 8. Odluke o izvršavanju Budžeta grada Cazina za 2020.godinu, privatna preduzeća i poduzetnici iz člana 2. ovog Pravilnika, mogu ostvariti u 100% iznosu za mjesec mart i april 2020.godine, slijedeće subvencije:

- a) Subvencija usluga odvoza smeća,
- b) Subvencija komunalne naknade,

c) Subvencija vodnih usluga,

(2) Za ona privatna preduzeća i poduzetnike iz člana 2. ovog Pravilnika kojima je u mjesecu martu i aprilu 2020.godine u toku trajanja stanja nesreće ili prirodne nepogode period zabrane ili obustave rada izmjenjen, ostvaruju pravo na subvencioniranja iz stava 1. ovog člana, ako je zabrana ili obustavljanje njihovog rada trajala najmanje 15 dana.

Član 4.

(Postupak ostvarivanja prava)

(1) Služba za privredu će na osnovu ovog Pravilnika objaviti Javni poziv za subvencioniranje usluga odvoza smeća, komunalne naknade i vodnih usluga, koji će se objaviti na web stranici i oglasnoj tabli grada Cazina.

(2) Privatna preduzeća i poduzetnici iz člana 2. ovog Pravilnika, mogu podnijeti Službi za privredu zahtjev za subvencioniranje jedne ili svih usluga i naknada koje su navedene u članu 3. ovog Pravilnika, u roku od 30 dana od dana objavljivanja Javnog poziva.

(3) Uz zahtjev su dužni dostaviti slijedeću dokumentaciju:

- a) Sudsko rješenje o registraciji preduzeća (za pravna lica ili poslovne jedinice) ili rješenje o registraciji od nadležnog organa (za fizička lica-poduzetnike),
- b) Uvjerenje o poreznoj registraciji poslovnog subjekta (ID broj),
- c) Obavijest o razvrstavanju poslovnog subjekta prema djelatnosti,
- d) Rješenje JU Komunalno stambeni fond Cazin o utvrđenom iznosu komunalne naknade za 2020.godinu,
- e) Račune JKP „Čistoća“ d.o.o.Cazin za usluge odvoza smeća za mjesec mart i april 2020.godine,
- f) Račune JKP „Vodovod“ d.o.o.Cazin za vodne usluge za mjesec mart i april 2020.godine,

(4) Dokumenti iz prethodnog stava ovog člana se dostavljaju u kopiji.

(5) Dokumenti pod tačkom d), e) i f) moraju glasiti na privatna preduzeća ili poduzetnike (podnosioc zahtjeva) iz člana 2. ovog Pravilnika, a isti se dostavljaju ovisno o traženoj subvenciji.

(6) Zahtjev za subvencioniranje se može dostaviti neporedno na protokolu Gradske uprave, putem pošte ili na e-mail adresu privreda@gradcazin.gov.ba

Član 5.

(Obrada zahtjeva i dodjela sredstava)

(1) Služba za privredu će obraditi prispjele zahtjeve u pogledu ispunjavanja uvjeta, nakon čega će se sačiniti prijedlog Odluke o usvajanju liste korisnika sredstava koji će se subvencionirati i liste podnosioca zahtjeva čije su zahtjevi za subvencioniranje neblagovremeni, nepotpuni ili neosnovani, koja će se dostaviti Gradonačelniku na usvajanje.

(2) Odluka o usvajanju liste korisnika sredstava koji će se subvencionirati i lista podnosioca zahtjeva čije su zahtjevi za subvencioniranje neblagovremeni, nepotpuni ili neosnovani, će se objaviti na web stranici grada Cazina (www.opcinacazin.ba) i oglasnoj tabli.

(3) Na objavljenu Odluku iz stava 2. ovog člana, svi podnosioci zahtjeva imaju pravo žalbe u roku od 8 dana od dana objavljivanja Odluke na web stranici i oglasnoj tabli grada Cazina.

(4) Žalba se podnosi Komisiji za žalbe, predstavke i prigovore Gradskog vijeća, a predaje se neposredno na protokolu Gradske uprave ili putem pošte. Žalba se taksira u iznosu od 10,00 KM, u skladu sa Odlukom o općinskim administrativnim taksama i tarifi administrativnih taksi.

(5) Nakon isteka roka za žalbu, odnosno nakon rješavanja po eventualno uloženi žalbama, Gradonačelnik po prijedlogu Službe za privredu donosi Odluku o usvajanju Konačne liste korisnika sredstava za subvencioniranje koja se nakon toga dostavlja JU Komunalno-stambeni fond Cazin, JKP „Čistoća“ d.o.o. Cazin i JKP „Vodovod“ d.o.o. Cazin. Ova Odluka će se objaviti na web stranici i u Službenim novinama grada Cazin.

(6) Javnim preduzećima i javnoj ustanovi iz stava 5. ovog člana će se nakon dostavljene Odluke o usvajanju Konačne liste korisnika sredstava za subvencioniranje, na osnovu zaključka Gradonačelnika izvršiti uplata iznosa subvencioniranih sredstava za privatna preduzeća i poduzetnike iz člana 2. ovog Pravilnika.

POGLAVLJE VI – ZAVRŠNE ODREDBE

Član 6. (Realizacija i nadzor)

(1) Za realizaciju i nadzor nad primjenom ovog Pravilnika se zadužuje Služba za privredu i Služba za finansije, računovodstvo i trezor.

Član 7. (Stupanje na snagu)

(1) Ovaj Pravilnik stupa na snagu danom donošenja a ima se objaviti u Službenim novinama grada Cazina.

Obrađivač: Služba za privredu
Pjanić Admir, dipl.pravnik

Broj: 01/GN-15-7061/20
Cazin, 30.04.2020.godine



GRADONAČELNIK
Mr.Nermin Ogrišević